

Mangaaba ga Yezu

(Mrk 16.1-10; Lúk 24.1-12; Zñ 20.1-10)

¹ Afalaña ana sabba ababa, dɛw abak ga lada vad ye ehəndze ga gosko ma, Mari ya Magdala ata Mari enne, tuuro ta tecəkwe dzeve ga Yezu. ² Kecəkwe afalaña tengeva ma, ahhañ agada ara ndzəda, malika ge Zigla eslea afa zegla, awa abolomoña akkwar amadzeve, ka ackadakala. ³ Acəzla aka mutada kazañ ka epeteke gaña andza talla aka mɛwwe kazañ. ⁴ Slɛdze ana tedzegwe dzeve ma, gubar azam tal dik ka tegerefebere tostoroa atahva tandza kəshem kazañ. ⁵ Malika azza kwatara ka ahatala wwala: «Gubar mazam kɛle da. Nasal ana kadbam Yezu, zal ana tebekefeñea afa ñgəlar mazləwakaba; ⁶'ene ekehne vvad da, añaabá a kəshem ava akaya na edeará kazañ. Namara ta kecəkwem aslam ana toforo nad. ⁷ Nomoro peñ kadmamtal ezle shek gaña kahamtala: “Añaaba ezle vved ava, akauro naaka àmaeñgəslea kɛle a Galile; ekehe aana ketemeñere nad.” Ede ana nawara ta madmakɛle enehe.» ⁸ Wal atal nehe tasla aka dzeve peñ ftek, gubar azmaaba tal dik ka tekeara manğayakala eene, tapahwa tuuro ta tanğanatarraba ede nehe ezle shek ga Yezu. ⁹ A voto va ma, Yezu awakatala a mongoava ahatala: «Nege kɛle use!» Tehdefeñere, tetelefeñea ahal afa shek, ka tavlal egre.» ¹⁰ Yezu ahatala zlaada: «Gubar 'mazam kɛle da, nomoro kadmamtal a romma ta tuuro a Galile, ekehe aana tètəñ no.»

Kwatar ana ezle medzəgwe dzeve tanğanaba

¹¹ Afalaña ana wal etille tekeba a voto ma, slɛdze gamənda ana tedzəgwe dzeve tuuro a berniy ava, ka tanğanatarraba azzlam ana tazdavá cici ezle oñgəñgwada ge ezle maslam ge Zigla. ¹² Oñgəñgwada ge ezle maslam ge Zigla tagayakabava ara ezle oñgəñgwada: afalaña tunakaba kwatara ma, tahalatal shəñgo dik a slɛdze aaka, ¹³ ka tahatala: «Kalama: “Ezle shek ga zal nehe tadará tazaba nada ara akkal aravvada, afalaña kendzeyema duwala. ¹⁴ Ka tandza ñgomna eceña ede nehe ma, enele aana nasəlam ede ana nadmamal, gata edəña 'mazdakəkɛleva da.”» ¹⁵ Slɛdze tahala shəñgo, ka tazad ede ana tadmatala. Neke ana eretere a godogo va ge ezle Zɛwif ha naaka.

Yezu ambakatalva ezle shek gaña

(Mrk 16.14-18; Lúk 24.36-49; Zñ 20.19-23; Ett 1.6-8)

¹⁶ Ezle shek ga Yezu dzomok mangar ftek tuuro a Galile, erea aka mondorvoa ana Yezu edetalkabará. ¹⁷ Afalaña ana teten nad ma, tavlal egre; ama bza gamenda tagwayan nad. ¹⁸ Yezu ahdafatarra ka ahatala: «Zigla avlawá makkwara cici erea zegla akabara atahva. ¹⁹ Neke ma, nomoro a mlam ava cici, kegremen mbiyez aka ezle shek gwala, kabalam tal ara slame ge Dede, ga Klaaña, ata Massafa Cazzlarraka, ²⁰ Vvad ma, kacacahamtala ta tazgal ede ana nacacahaklé cici. Vvad ma, sèlam ana: nenefekèle kudzij-kudzij, ha àmazlèbalara mandavara ya mlam.»

MRK - MADA : Wakita ge Zigla ara kwatar Mada

MARK

Mark

Mark

Kwatar marāba ga Yezu ana Mark apakal

Kwatar marāba ga Yezu ana Mark apakal

Mark

Mapafaɗavaraaɗa

A dagava va ga wakita uffad ya kwatar marāba ga Yezu ma, wakita ga Mark ana makcabaɗa betek-betek ka àmazadva ana adzaka dik.

Afa mapakalaɗa ye ehəndze ma, ambak Yezu aka «kla ye Zigla kazaɗ» (Mrk 1. 1.) Ama sləme nehe ana agwayaɗ mbiyez ka mbaca tambadakala shek edeaɗa a kwatar marāba va cici ma, (Mrk 1. 11; 9. 7; vvaɗ ma, Mrk 3. 11; 5. 7,) mege aka moɗgovova ga Yezu ma, emene mandahaɗa (Mrk 3. 12; 5. 43; 7. 24; 8. 30; 9. 30.) Amamay? Adaba ana emecɗɗa ma, ara mecəkwe bba ga slɗdze ya Rom, zala ana amtá afa ɗgəlar mazləwakaba.

Mbaca, draw mbreɗa ana teplere ambakva ma, aɗgəsakal ta wa tuksa meɗgəcekabaava naɗ leele. Mefetalva a sləme va a dene ge Zigla ettew ga Zeaɗ Batist enehe (Mrk 1. 2-8,) ana yaɗ ana abala Yezu te (Mrk 1. 9-11.)

Zlaaka, allanɗbava ga sarta ya mukmanakaba gaɗa akabiyɗ ma, (Mrk 1. 12-13,) mackana ga Yezu baɗ-baɗ apafaɗva. Zlaama Mark ambak makkwara ga Yezu abak gamənda, afalaɗa azala mbiyez ta taddalaɗ, afalaɗa akacacahatala azzlam a muuza mege afalaɗa embelen ezle ede-mawala (Mrk 1. 14-8. 30.)

A kwatar ava gaɗa ya səlaya ma, Mark ambak Yezu ana akauro aslam ciche, mamta ata maɗgaaba gaɗa ana akanɗgasl naɗ erea Zerozalem (Mrk 8.31-10. 52.) Shek mahkar ana admatal ezle shek gaɗa, ama tœcœɗvoa da. Abak gamənda mɗdekaba ana mala yaɗ ma: «Kla ya mbiyez,» ama edəɗa mandəhaɗa ana ecəkwe naɗ ma, eke baɗgallaɗa.

Afalaɗa eɗgeva a Zerozalem dosso ma, agara ezle macakala a ɗga va ge Zigla ka aslara zeva ara ezle madakama ge dene ge Zigla ya Israyel.

Mandavara ya matakalavara voto ya macacahatala ezle zeva gaṇa, a muuza, ezle shek gaṇa (Mrk 11-13.)

Shapitre 14-15 eke mandavara ya vad sēla ga Yezu ana acacahatala a mbiyez a. Ekehe ana tazlābalava mandavara ya mūde aka daf ana tazmaava ara ezle gaṇa (tazam daf ara uzom meshe,) mandavakuda gaṇa ana akabiyen a zerden ava ga Zecemane, maksa naḍa, muna naḍa, mebekefenere naḍa afa ṅgəlar mazləwakaba, mofoa naḍa e dzeve va. Ebekənenya ya mamta gaṇa ma, wwal tazlābal e dzeve gaṇa gwen ka tecen ana aṅgaaba a kəshem ava ekeara sifa (Mrk 16. 1-8.) Zlaama tacəkwa patatta. (Mapakala gamənda tafarkal mūde ana adzakaba mambakava ga Yezu ana aṅgaaba e kəshem ava ara mocoloro afa zegla; mambada nehe ma, eke mambakaanja cərah-cərah a wakita va ya kwatar marəba gamənda.)

Allaṅbava ga ya ana kambadama kwatar marəba ga Mark nehe taa, kasəlam aka ga bba ga sludze ya Rom nehe kazaṇ, ana Yezu ya Nazaret ma, «eke kla ya Zigla dadaanja diyaw?» (Mrk 15. 39.)

1

Kwatar ge Zigla ana Zeaṇ Batist ambada

(Mat 3.1-12; Lək 3.1-18; Zḡ 1.19-28)

¹ Ekehne aana kwatar marəba ga Yezu Kriste Kla ye Zigla apafanva.

² Erea a wakita va ga zal madmara kwatar ge Zigla Izayi ma, eke mapakalanja ana Zigla ala:

«Ehinne nokoploko zal maslala gwala akama goko, ta matkakwa voto.

³ Awazlaha ga mbrenja ehənderea algwa ana ala:

Slememen voto ga Onḡgo,
Tayamanala voto ndadda leele!»

⁴ Ana neke ana Zeaṇ Batist ambakva algwa va; azala mbiyez ahatala: «Mbədamkaba mackana gəkəle, balam ta Zigla mambiyakəkəle kabara mehəsheṇa gəkəle.» ⁵ Ezle ya aka ahhan ga Zude cici ara ezle ya berniy ava ga Zerosalem, tuuro aslam gaṇa; tambadaaba mehəsheṇa gatala baṇ-baṇ ka Zeaṇ abalatal erea dlaava ya Zurden.

⁶ Zeaṇ efefebere epeteke ya ana tawal ara argwad əzləegma ka kandan ya ambal eleṇere; ahapadaya ayaw, azamaya amma ya algwa

eene.⁷ Ahatala muuza ya: «Mbre ana akawa allanva gwala ma, otom no ara gorgor; 'nesle ya mongədohoho ta napasarraba ezne ya kimaka va gaŋa shewedek da.⁸ No ma, nabala kɛle ara yam, ama yaŋ ma, àmaabala kɛle ara Massafa Cazzlarraka.»

Mabala ata mukmana Yezu a

(Mat 3.13–4.11; Lɤk 3.21-22; 4.1-13)

⁹ Zlaama Yezu eslere Nazaret, aka ahhaŋ ya Galile, ka Zeaŋ abala naɗ a dlaava ya Zɤrdeŋ.¹⁰ Afalaŋa ana Yezu akaslaaba a yam ava ma, eteŋ mla afa zegla ana atəkabava ka Massafa Cazzlarraka aŋgərakarra aka andəwal kazaŋ.¹¹ Zlaaka awazlaha ehənderea afa zegla ana ala: «Nakw ma, Kla gwala mandarkwaslaaŋa; ana azawa brova cici.»

¹² Ekehe fler ma, Massafa ohcoro naɗ erea algwa.¹³ Yezu eckedere ekehe vaɗ dzem-dzem uffad ka Shetene ukman naɗ. Ackada a dagava va ga azzlam algwa, malika tazdala ettewa.

Yezu azala ezle magasa klefa uffad

(Mat 4.12-22; Lɤk 4.14-15; 5.1-11)

¹⁴ Abak enne, afalaŋa toploro Zeaŋ a dangay ava ma, Yezu uuro a Galile; ambaɗa kwatar marəba ana eslea aslam ge Zigla.¹⁵ Ala: «Mlamaaŋa ana tefé adará, adaba ana kwatar ya makkwara ya mla Bba va ge Zigla ahɗará! Mbəɗamkaba mackana gœkɛle, vvaɗ ma, femaava kwatar marəba!»

¹⁶ Yezu akarawakaba ala dlav ya Galile, ma eteŋ ezle magasa klefa səla, Simoŋ ata ramman Andre, topoloyovoro gadaŋ a dlav ava.

¹⁷ Yezu ahatala: «Domolo ta negreŋ kɛle aka ezle mehelewea mbiyez a.»¹⁸ Ekehe-ekeheaŋa ma, tambra gadaŋ gatala ka taddalaŋ.¹⁹ Yezu ohɗoro akamaŋa enœkwe ma, eteŋ Zeak ata ramman Zeaŋ, bza ye Zebede. Tekeba a sləlah ava ya aka yam gatala tekeslemeŋ gadaŋ gatala.²⁰ Ekehe-ekeheaŋa ma, Yezu azalatal; taslalaŋa ala dedeŋ gatala Zebede a sləlah ava ya aka yam ara ezle ettew ka taddala Yezu.

Zal ana massafa mehəsheŋa agraba naɗ a

(Lɤk 4.31-37)

²¹ Yezu ara ezle shek gaŋa tuuro a berniy ava ya Kapernaum. Abak a sabba ma, Yezu uuro ŋga va ya mendevea kuɗa ka apafaŋva afa

macacahatala azzlama a mbiyez a. ²² Ezle ana takaedelkal sləme ma, tagwacafabara draw macacaha gaŋa nehe; adaba ana macacaha gaŋa nehe 'andza aka ga mɛshe ya mocoama kazaŋ da, ama acacahatala ara ndzəda ana Zigla avlal. ²³ Mbaca, erea nga va ya mendevea kuda nehe ma, mbreŋa ekere dadaaŋa ana massafa mehəsheŋa agraba naɗ a. Atava ala: ²⁴ «Kongovafenele may, Yezu zal Nazaret? Kawa ta kazmakaba nele yaw? Nasal leele ka nakw way: zal Acazzlarraka ana Zigla eplere!» ²⁵ Yezu aŋgazakal aka massafa mehəsheŋa nehe, ka ahala: «Malava, slara a zal hinne va!» ²⁶ Massafa nehe egweceŋ naɗ dik ka aslara a yaŋ ava atafababara tuwa dik. ²⁷ Mbiyez cici tagwacafaba, teddeyeŋfaba tala: «Henne ta may? Macacaha ɛwwəŋa ana ekeara ndzəda! Zal hinne akkwara mege massafa mehəsheŋa ka tecellenkal sləme!» ²⁸ Ka peŋ ftek ma, sləme ga Yezu eceŋva aka ahhaŋ ya Galile cici.

Yezu embelen ezle ede-mawala dik

(Mat 8.14-17; Lɛk 4.38-41)

²⁹ Yezu ara ezle gaŋa taslara a nga va ya mendevea kuda, tuuro fler ava Simon ata Andre, ka Zeak ata Zeaŋ tozoro tal. ³⁰ Morovo ga Simon eke aka sləlah, adaba ana ebefeneŋere okko; afalaŋa Yezu engeva dedem ma, tɛdelkala aka wal nehe. ³¹ Yezu ehdefeneŋere, agas ahal gaŋa ka aksaaba naɗ a. Okko amatalaŋara ka apafaŋva ya mavlatala azzlam mazma.

³² Akahrawa afalaŋa fat edevá ma, mbiyez tehelelkebere ezle ede-mawala ara ezle ana massafa mehəsheŋa ekea atal ava cici a Yezu a. ³³ Mbiyez ya berniy ava nehe cici teke magayakabavaaŋa aka mevedeŋga ya nga nehe. ³⁴ Yezu embelen mbiyez dik ana tacaka ceche ara ede-mawala gargəra ka agaraya massafa mehəsheŋa dik eene. 'Avlatalà voto a massafa mehəsheŋa nehe ta tɛde tam, adaba ana tasal naɗ.

Yezu arawakaba a Galile

(Lɛk 4.42-44)

³⁵ Akwadzaŋavaaŋa dɛw, mbaca mlam ekekere ma, Yezu aslaaba ka aslara agaba. Aslaba a berniy ava, uuro dzak, ekehe ma, apafaŋva afa mandava kuda. ³⁶ Simon ara ezle ana tekeava tuuro tadba naɗ;

³⁷ afalaŋa tazlɔbalá ma, tahala: «Mbiyez cici takadba kwal.» ³⁸ Ama Yezu ahatala: «Njeme e genne, erea a ksa va ana teke hoedœ-hoedœ. Nàambada kwatar ge Zigla erea ekehe eene, adaba ge nehe aana nawa.» ³⁹ Ana neke ana arawa aka ahhanj ya Galile cici; ambada kwatar ge Zigla erea nga va ya mendevea kuda ya aka ahhanj nehe ka agaraya massafa mehæsheŋa.

Yezu embæleŋ zal mlam-zegla

(Mat 8.1-4; Løk 5.12-16)

⁴⁰ Zal mlam-zegla edæŋa awakala aka Yezu a, esleke hoedœedœem akama gaŋa ka eddenfaŋa ta mazlaka nad ahala: «Tandza kongov ma, kèembæleŋ no cek.» ⁴¹ Andzafaŋ biyya afa Yezu; otloro ahal, etlefeŋere ka ahala: «Naksakaba, mbal!» ⁴² Ekehe-ekeheŋa ma, mlam-zegla aslafaŋa afa zal nehe ka ambal. ⁴³ Zlaaka, Yezu admal ara ndzæda ocofoboro nad ekehe fler ahala: ⁴⁴ «Ceŋ leele, 'kambadalkala aka ede hinne a mbreŋa da. Ama uurokal aka zal maslam ge Zigla ta mecækwe kwal, gata kagra fla ya ana Moyiz ala tazad, ta mambakatal a mbiyez cici ana kambalá.» ⁴⁵ Zal nehe aslafaŋa, ama apafaŋva ya mambadalkala mege erea ŋa aka ede ana azdakalavará a mbiyez cici. Adaba ge nehe ma, Yezu 'èmeembe ta mambakva a berniy ava cek vvd da; ackada afa luva, dzak. Zlaama mbiyez teslekebere a ksa va gargæra tawakala.

2

Yezu embæleŋ zal mahaba edæŋa

(Mat 9.1-8; Løk 5.17-26)

¹ Allañbavaaŋa ga vad edæŋa ma, Yezu embædekerevere a Kapernaem, ka tecen ana eke agam. ² Mbiyez dik tagayakabava, ha aslam 'ene da, mege avarva aka mevedeŋa eene. Ka Yezu ambadatal kwatar ge Zigla. ³ Ezleŋa edæŋa tengeva, tezelbere zal mahaba edæŋa ana mbiyez uffad taza. ⁴ Ama 'tembe ta tambakal a Yezu cek da, adaba ga muuza ya mbiyez. tandaba nga avla aslam ana Yezu ahanj; evved ava nehe ana tandaba ma, tababara zal mahaba nehe mahladaaŋá aka slalah gaŋa. ⁵ Afalaŋa Yezu eteŋ mefeavara ge ezle etille ma, ahala a zal mahaba nehe ya: «Kla gwala, mehæsheŋa goko

eke mambiyakwabará.»⁶ Múshe ya mocoama gamənda ana teke ekehe macakadaañá ma, tandawa a godogo va gatala tala:⁷ «Amama ana zal hinne ðude neke may? Alaval e Zigla. Wa ana èmembe ya mambiyakabara mehəsheŋa cek way? Zigla ftek ana èmembe!»⁸ Yezu asal mayahanġar gatala eke fler ka ahatala: «Amama ana kekemara draw mayahanġar etille may?»⁹ Afohaŋa taa ana wele, ya ana nahala zal mahaba ya: “Mehəsheŋa goko eke mambiyakabaraañá yaw,” da taa, ana nahala: “Slaaba, azza sləlah goko karawa yaw?”¹⁰ Ama nonġov takasəlam ana: Kla ya mbiyez ma, ekeara membe aka ahhaŋ ya mambiyakabara mehəsheŋa.» Zlaama ahala zal mahaba nehe ya:¹¹ «Naďmakw, slaaba, azza sləlah goko ŋga ava goko!»¹² Ekehe-ekeheŋa afalaŋa mbiyez cici tekecəkwe naď ma, zal nehe aslaaba, azza sləlah gaŋa ka asla. Atal cici tagwacafabara; tazləba Zigla, tala: «'Netemenjá draw ede hinne deede tam!»

Yezu azala Levi

(Mat 9.9-13; Lúk 5.27-32)

¹³ Yezu ambəďakalva uuro afa mudzadzal ya dlav ya Galile. Muuza ya mbiyez tawa aslam gaŋa ka yaŋ acacahatala azzlama.¹⁴ Afalaŋa akaba ma, eteŋ Levi, kla ya Alfe, eke mackadaañá erea ŋga va ya maŋgəzla. Yezu ahala: «Dolo!» Levi aslaaba ka addalaŋ.¹⁵ Yezu azam ďaf erea ava Levi. Ezle maŋgəzla dik ara ezle mehəsheŋa gamənda tekeavara ala ďaf ara ta yaŋ, akabara ezle shek gaŋa, aďaba draw ezle etille ma, teke dik ana takaddalaŋ.¹⁶ Ezle Farizenġ ana teke múshe ya mocoama teke ekehe. Afalaŋa teteŋ ana Yezu akazam ďaf ara ezle etille cici ma, tahatala ezle shek gaŋa ya: «Amama ana azam ďaf ara ezle maŋgəzla akabara ezle mehəsheŋa may?»¹⁷ Yezu eceŋfatala ka ahatala: «Ezle ana teke calaŋ-calaŋ ma, 'tege kuďa ya zal dakutar da, ezle ede-mawala aana tege kuďaŋa. 'Nawa ta nazala ezle ana tahalava aka ezle dzerere da, ama ezle ana tasal ana atal ezle mehəsheŋa.»

Yezu ðudekal aka ndəra mazma

(Mat 9.14-17; Lúk 5.33-39)

¹⁸ Abak enne ma, ezle shek ge Zeaŋ Batist ara Farizenġ tazam ndəra. Zlaama mbiyez tawa teddeŋfaŋa afa Yezu a tahala: «Amama ana ezle shek ge Zeaŋ Batist ara ge ezle Farizenġ tazam ndəra, ka ezle shek

goko tazam da may?»¹⁹ Zlaama Yezu ahataalkala: «Kayahamngar taa ezle ana tedden tal aka wal maza tèmbe ta tambra azzlam mazma afalaɗa ana zal ga wal ekefetal yaw? 'Amazaɗa da! Tandza zal ga wal ekefetal ma, 'tèmbe ta tambra azzlam mazma da.²⁰ Ama sartaɗa àmawa ana tazafatala zal ga wala; abak nehe ma, tàazam ndèra.

²¹ Mbrenja 'èmesheva epeteke ɗwwe epeteke va mandakwa cek da; kaɗa dama epeteke ɗwwe nehe èmendèrehen epeteke mandakwa, vvaɗ ma, vvedenja àmawadalan vvaɗ.²² Vvaɗ ma, mbrenja 'àmòdoworo ozom ɗwwe arwa^o va ya ambal mandakwa cek da; kaɗa dama, ozom nehe àmatezleyen arwa ya ambal etille: ozom mehàshen arwa ya ambal tuksa teheshen: Ama iyas! Akaya ozom ɗwwe ma, arwa ya ambal ɗwwe kaɗa!»

Yezu ata sabba

(Mat 12.1-8; Lùk 6.1-5)

²³ Abak sabba enne ma, Yezu abadaɗa uvah ava ya ble. Ezle shek gaɗa tøndzəhofonabara ble afalaɗa takarawa.²⁴ Zlaama ezle Farizen tahala Yezu a: «Cəkwe, amama ana ezle shek goko tagra eɗe ana mocoama gele avlanelefaɗa voto a bak vaɗ mapsava tam may?»

²⁵ Yezu ahataalkala: «Deede kambadamá eɗe ana bba onngo Davit ara ezle ana tekeavara, nɗwel awal tal ka eɗəɗa ya mazma 'enefatal da tam yaw?²⁶ Uuro a nɗga va ge Zigla ka azam depen ana tàavlal e Zigla. Abiyatar ana eke zal maslam ge Zigla onngo afalaɗa nehe. Mocoa-ma geme ma, avlatal voto ma, ezle maslam ge Zigla etille dezl ana tàazam depen nehe, ama bba onngo Davit azam, avlatal ezle gaɗa ana tekeavara.»²⁷ Yezu ahatala vvaɗ a: «Vaɗ mapsava ge ezle Zɗwif ma, tazaaba akaya ge mbiyez; mbiyez ma, 'tepe tal akaya sabba da.

²⁸ Adaba ge nehe aana, Kla ya mbiyez eke onngo mege ya sabba.»

3

Yezu embalen zalɗa eɗəɗa a bak sabba

(Mat 12.9-14; Lùk 6.6-11)

^o**2.22** arwa nehe ma, aka ahhan ge ezle nehe ma, todoworo ozom arwa va ya ambal.

¹ Kecəkwe ma, Yezu ambəđakalva uuro a ɲga va ya mendevea kuđa. Erea ekehe ma, zalɲa eđəɲa eke ana ahal mekwəlefaɲaɲá. ² Ezle Farizenɲ tecəkwe Yezu teđ-teđ taka èmembəleɲ zal nehe abak a sabba yaw? Adaba ana toɲgov ta tembedefenere kwatar. ³ Yezu ahala zal nehe ana ahal mekwəlefaɲaɲá ya: «Slaaba ekehne, akama ge mbiyez cici.» ⁴ Ka eddenɲfatala afa ezle ana tekecəkwe nađ: «Mocoa-ma geme taa, avlamne voto ya may? Ya magra ennde bi ya magra mehəsheɲa abak a sabba yaw? Ya mɛɛbeɲa sifa ga mbreɲa yaw andza tambra ta mamat yaw?» Ama 'toɲgov ta tangaɲalkal da. ⁵ Yezu ecəkwe tal cici ara mawalakaba; andzara sassiyya adaba ana toɲgov ta 'teceleɲkal da. Zlaama ahala zal nehe ya: «Tlara ahal goko.» Yaɲ otlorro ka, ahal gaɲa eslemeɲva. ⁶ Ezle Farizenɲ taslara a ɲga va ya mendevea kuđa ka tagayakabava ekehe fler ara ezle ga Erod^p ta tedzekal ka ahawa ana tambafaɲ ta takad Yezu haway.

Muuza ya mbiyez dik tawa aslam ga Yezu a

⁷ Yezu aɲganabava ara ezle shek gaɲa tuuro afa mudzadzal ya dlav ya Galile, muuza ya mbiyez dik taddalaɲ. Mbiyez nehe teslekelbere a Galile akabara Zɛde, ⁸ a Zerusalem, erea aka ahhaɲ ga Idɛme, aka ahhaɲ ana aka Ida enne ga Zɛrdeɲ akabara aka ahhaɲ ga Tir ata Sidonɲ. Tawa dik aslam ga Yezu adaba ana tecenɲá eđe ana agra cici. ⁹ Zlaama Yezu eddenɲfatala afa ezle shek gaɲa ta tefela sləlah ya aka yam ta muuza 'təɲgəđəœcœɲ nađ da. ¹⁰ akaya na embelenɲá mbiyez dik kazaɲ ma, zere ezle ana takacaka ciche ara eđe-mawala takadava ta tuuro tetelefenere ahal. ¹¹ Zlaama afalaɲa ezle ana massafa mehəsheɲa teketrebeɲ tal tetenɲ nađ ma, tostorro ala shek gaɲa ka tatayaɲva, tala: «Nakw ma, Kla ye Zigla!» ¹² Ama Yezu admatall ara ndzəda ta 'tadmaaba taka yaɲ wa da.

Yezu adzərraba ezle masləla dzomok maɲgar səla

(Mat 10.1-4; Lɛk 6.12-16)

¹³ Kecəkwe ma, Yezu ocoloro aka mondorvoa; azala ezle ana oɲgov tal, tawa aslam gaɲa. ¹⁴ Apalaaba mbiyez dzomok maɲgar səla ana azala tala ezle masləla. Egrenɲ eđe nehe ma, ta tene aslam gaɲa gata

^p**3.6** Erod hinne ma, Erod Aɲtipas

mopoloro tal aka mambada kwatar maraba, ¹⁵ ara ndzoda ya magaraya massafa mehasha. ¹⁶ Ezle dzomok mangar sala etille ehinne: Simon ana Yezu edel slame azala Piyer, ¹⁷ Zeak ata ramman Zean, cem sala bza ye Zebede ana Yezu azalatala Bowanerges, ana ongov ta mala: «Ezle ana tandza aka mangalava ya uvar kaza,» ¹⁸ Andre, Filip, Bartelemi, Matiyoe, Tomas, Zeak kla ya Alfe, Tadde, Simon zal ana oegokorro aka ahhan gaha, ¹⁹ ka Zudas Iskariyot zal ana omoskomoa Yezu.

Ezle ya agaba ga Yezu tongov ta taza nad a

²⁰ Yezu asla anga agam. Muuza ya mbiyez tannga gayakabava, Yezu ara ezle shek gaha 'teneara voto ta tazam edana da. ²¹ Afalana ezle ya agaba gaha tecen ede nehe neke ma, teplebeevere ta tawa tekshebere nad a, adaba ana tala: «Gudgo ushenkalavara!»

Yezu anganakal aka kwatar ana tembedefejere

(Mat 12.22-32; Luk 11.14-23; 12.10)

²² Mushe ya mocoama teslere a Zerozalem tala: «Belzebul: bba ga massafa mehasha ekea yan ava, yan aana avlal membe ya magaraya massafa etille!» ²³ Zlaama Yezu azalatal, udeara tal ara kwatar masala ahatala: «Ahawa ana shetene amaagara shetene haway? ²⁴ Tandza ezle ya aka ahhan ga bba ftek tegefaba shilek a ma, mla bba va nehe 'emeene da; ²⁵ ka tandza ezle ya agaba ftek tegefaba shilek ma, mla agaba nehe 'emeene da. ²⁶ Tandza Shetene egefaba shileka ka 'ecenfaba slame da ma, makkwara gaha 'amackada da, amaakwandza.

²⁷ Mbrena 'amaanga agaba ga zal ndzoda ta mahala nalmana gaha zeya mahadaka zal ndzoda nehe cek da, ama afalana ahadaka nad a ma, amahalahanara azzlama cici cek. ²⁸ Nadmakule hinne ma, dzerere: zere mehasha ge mbiyez mege ya ana talaval e Zigla ma, emene mambiyakabaraana cek. ²⁹ Ama mbre ana alaval a Massafa Cazzlarraka ma, 'tambiyalkabara deede da, mehasha gaha emenekal ekebebe.»

³⁰ Yezu udeatal neke ma, adaba tala: «Massafa mehasha ekea yan ava.»

Amman ara roman a Yezu

(Mat 12.46-50; Lúk 8.19-21)

³¹ Zlaama amman ara roman a Yezu tengeva; tastakaba avarva ka tosloloro mbreña ta mazala nad. ³² Mbiyez dik tekelañ ala Yezu mackadañá ka ahala: «Ceñ, ammakw, ara romakw zawalaña ara romaña teke avarva, teddenkwal.» ³³ Yezu alakala: «Wa ana amma gwala way ka, ezle wele ana ata roma wele?» ³⁴ Ka ecəkwe mbiyez ana tengəwenkaba nad ala: «Cəkwe amma ara roma teke ekehne. ³⁵ Adaba mbre ana azad ede ana Zigla oñgov ma, eke ramma gwala zalaña, bi walaña bi amma gwala.»

4

Kwatar masəla ga zal mekleña hoelfe

(Mat 13.1-9; Lúk 8.4-8)

¹ Yezu apafañva vvađ afa macacahatala azzlama a mbiyez ala dlav ya Galile. Muuza mbiyez dik tagayalañva, adaba ge nehe aana ka ocoloro, eckedere a sləlah ava ya aka yam. Sləlah nehe ekekal aka dlav ka mbiyez teke afa mudzadzal, hoedə-hoedə ga yam.

² Acacahatala azzlama dik ara kwatar masəla ka ahatala a macacaha va gaña ya: ³ «Demkal sləme! Abak enne ma, zalña edəña uuro uvah ava gaña ta mekleñ hoelfe. ⁴ Mbaca, afalaña ekeklenj hoelfe ma, hoelfe gamənda teste ala voto: eddenj tawa tandaba. ⁵ Hoelfe gamənda tastakal aka ngar plad ana ahhañ 'enekal leele da. Hoelfe nehe tafat peñ adaba ana ahhañ 'enekal dik da. ⁶ Afalaña fat akadav dik ma, ehlenj bzaa azzlam maftá etille: təkweleaba adaba ana sləre gatala 'obloró dik tam. ⁷ Hoelfe gamənda tostovoa a nga dak ava. Adak nehe tadak ka tənğədəccəñkaba azzlam maftá enndende aaka, ana ka 'tapafañá tam. ⁸ Ama hoelfe gamənda teste aka ahhañ ennde; azzlam tafat, tadak, taslara ka tanah: gamənda dzem-dzem mahkar, gamənda dzem-dzem mokko ka gamənda tuksa darmak.» ⁹ Yezu ala: «Mbre ana ekeara sləme ya meceña ma, meceñ!»

Amama ana Yezu ɤudeara kwatar masəla may

(Mat 13.10-17; Lúk 8.9-10)

¹⁰ Afalaña teke akabiyangatala ara ta Yezu ma, ezle ana tazgal nad dzek ara ezle masləla dzomok manjar səla teddenfaña aka kwatar

masəla nehe. ¹¹ Yaŋ ahatakala: «Enœkœle ma, katamkalavará eďəŋa mandəhá ya kwatar makkwara ya mla Bba va ge Zigla; ama ta ezle gamənda tecəŋ ma, si ara kwatar masəla dzek, ¹² aka nehe kazaŋ ma, “Tecəkwe cek dadaaŋa ama 'tèetenj leele da, tecəŋ cek dadaaŋa ama 'tœeshœvoro yam leele da, ana gata tecəŋá leele ma, tombədokorrovro aka Zigla, gata Zigla mambiyatalkabara!”»

Yezu ebeleŋaaba kwatar masəla ga zal mekleŋa hœlfe

(Mat 13.18-23; Lúk 8.11-15)

¹³ Kecəkwe ma, Yezu ahatala: «Enœkœle kecemenj kwatar masəla hinne diyaw? Zlaata ahawa ana kèecemenj kwatar masəla gamənda cici haway? ¹⁴ Zal mekleŋa hœlfe ma, zal ana ambada kwatar ge Zigla. ¹⁵ Ezle gamənda tandza aka luva ya voto ana kwatar testelaŋ kazaŋ: afalaŋa tecəŋ dezl ma, Shetene awa ahalatarraba kwatar nehe fler. ¹⁶ Ezle gamənda tandza aka ahhaŋ ya aka ŋgar plad ana hœlfe tastakal kazaŋ: peŋ ftek afalaŋa tecəŋ kwatar nehe ma, taksakaba ara maŋgayakala. ¹⁷ Ama 'tambra ta kwatar nehe moɓloro sləre atalava da, tœnefeŋevere sarta enœkwe dezl. Zlaama, afalaŋa ciche awa bi magraba adaba ga kwatar ge Zigla ma, taŋgafaŋa afa mefeavara gatala fler. ¹⁸ Ezle gamənda tandza aka ahhaŋ ya ŋga dak ava kazaŋ: tecəŋá kwatara, ¹⁹ ama mayahaŋgar ya azzlam ya dœniya va hinne, nalmana ana telmefebee tal ara arah ya azzlam nehe cici uurotala a brov ava, tœŋgədœcœŋkaba kwatar nehe aana 'apafaŋ mege enœkwe da. ²⁰ Ezle gamənda, tandza aka ahhaŋ ennde kazaŋ: tecəŋ kwatar, tagas ka tapafaŋ, gamənda dzem-dzem mahkar, gamənda dzem-dzem mokko ka gamənda darmak.»

Kwatar masəla ya lalampa

(Lúk 8.16-18)

²¹ Yezu ahatala vvaď a: «Mbrenj a maazara lalampa ta mofohoro aha saw bi aha gəlezi yaw? èmefe aslam dzəgama ndar da ya? ²² Zere eďe ana eke mandəhaaŋá ma, àmaambakva abak a vaď oŋŋo, ka zere eďe ana eke memelenj ma, àmaecəŋva a cazzlarraka va. ²³ Mbre ana ekeara sləme ya meceŋa ma, meceŋ!» ²⁴ Yezu ahatala vvaď a: «Famkaba sləme aka eďe ana kekecemenj! Zigla àmagwarakœle ara

daram ana kagwaramtalara a mbiyez a, vvađ ma, àmaafarkulekal.
²⁵ Adaba mbre ana ekeara eđəŋa ma, àmatakalva vvađ; ama mbre ana 'eneara eđəŋa enəkwe da ma, tazafaŋa mege enəkweaŋa nehe ana àmɛɛnelenva vet.»

Kwatar masəla ya hœlfe ana afat akabiyen

²⁶ Yezu ala vvađa: «Aana neke ana kwatar makkwara ya mla Bba va ge Zigla andza: Mbrenja eklenj hœlfe uvah ava gaŋa. ²⁷ Zlaaka uuro endzeduwal arravvađ ka maslaaba kalla vađ, afa sarta nehe ma, hœlfe nehe tabal sləre ka tafat zeya ana ta masaləfaŋ. ²⁸ Ahhaŋ eftenjara ara ahal gaŋa hœlfe nehe: ehəndzenja ma, avvaŋaŋa, ka godogonja maslara, allanvaanja ma, manahaŋa leele a ŋgavaanja. ²⁹ Afalaŋa anah dezl ma, zal nehe abaz ara uvvađ gaŋa, adaba ana sarta ya mehelere azzlam algwa engeva.»

Kwatar masəla ya hœlfe ana adak aka kla meshire kazaŋ

(Mat 13.31-32,34; Lɥk 13.18-19)

³⁰ Yezu ala vvađa: «Mepecekaba kwatar makkwara ya mla Bba va ge Zigla ata may? Ara kwatar masəla wele ana mɛɛdekal wele? ³¹ Andza aka hœlfe ana adak aka kla meshire kazaŋ; ana afalaŋa tezləge ma, yaŋ aana uva kla ya hœlfe ya azzlam ya mlam ava cici. ³² Ama allanvaanja ana tezləgé ma, adak ka atam azzlam ana mezləgeaŋá erea zerdenj ava cici. Abala dik ha ana eđdenj tòwolohonoro ossok gatala aha sheesheŋa cek.»

³³ Ana neke ana Yezu acacahatala kwatar gaŋa dik ara kwatar masəla drawaŋa etille; ambađa akaya na ezle medelkala sləme tecelenjal cek. ³⁴ 'eɛdeara tal zeya kwatar masəla da; ama afalaŋa ekeara ezle shek gaŋa dezl ma, mebelenjtarraba cici.